

**Emplec especific de « desbatiar »**

- *Alavetz, memé, quin t'ac viras dab lo mainadèr ?*
- *Non me'n parlis pas ! Ne'm vòlen pas créder en arren ! Que crei que'm van har desbatiar !*

En la religion catolica lo batiou que permet a un mainat d'entrar en la comunautat deus crestians. « Desbatiar » qu'ei donc pèrder la soa identitat crestiana. Sortir d'aquera comunautat qu'ei ua metafòra : que vòu díser pèrder las soas marcas, en aqueste cas pèrder lo cap, la rason.

« Desbatiar » qu'a tanben un aute sens : enmaliciar.

Auta expression en aqueth registre:

*Que'm van har virar la bòla !*

Que's sembla hèra a l'expression francesa de « pèrder la bòla »

La bòla que representa lo cap, mei precisament lo cervèth. Pèrder la bòla qu'ei pèrder la rason. Notem que la bòla e pòt virar en tots los sens, n'a pas nada posicion de referéncia.

**Locucion advèrviau metaforica : a truca-talon**

- *Vam qu'as anat har au mei córrer dab lo Jantet ?*
- *Oc. Que credè de m'aver. Mes jo que l'èi seguit a truca-talon e a la fin que l'èi passat davant !*

Expression de bon comprèner : quan corres darrèr quauqu'un, si ès tot au ras, que'u pòdes trebucar los talons... a trucas de'u har càder !

**Formula entà comptar...**

*Quate crabas que hèn setze pès*

*E tres de chivau*

*Que hè dètz e nau*

Aquesta formula qu'a ua portada pedagogica : qu'ei ua leçon de calcul mentau entaus petits... e taus grands dab ua multiplicacion seguida d'ua addicion. Mes perqué tres pès de chivau ? Qu'ei lhèu ua borra pr'amor las crabas e los chivaus qu'an tostemps quate pès ! Vè tu saber !

**Medecina populara : lo luson**

*Lo luson qu'ei ua irritacion de la pèth, ua sòrta d'eczèma. Que hè ronds sus la pèth. Lo bestiar que l'an au cap e au còth e que's pren a las personas.*

*Entà guarir que cau anar tà dehòra, de matin e dejun. Lo malaut que's deu passar sau dab eishaliva e fretar la plaga en díser :*

***Luson, luson***

***De jun que soi***

***Autan plan com tu e jo***

***Dab l'arrós devath deu só.(HL)***

D'après Palay aquera afeccion qu'ei dartra qui's ditz donc luson a Ortès e braguen en d'autes lòcs. Que tieni aqueth remèdi deu men pair qui disè « luson » o « brègas »

Aquera malaudia que's ditz *colibre* o *colobre* de las parts d'Auloron. Que trobam lo mot en ua pregària entà guarir deu cindre (zona)

Los guaridors qu'avèn mei que mei ua formula esoterica qui non comprenèn pas lo malaut. Que i avè atau a l'encòp drin de mistèri e de solemnitat qui impressionan lo malaut e qui avèn com un poder entà'u condicionar ... e de segur entà'u guarir !

Aquesta formula que hè pensar a la tradicion de l'arrós deu matin de Sent Joan. Lo monde que's brusavan en l'arrós qui avè lo poder de guarir majament maus de la pèth.